

保定府志

第十六冊
卷四十三
陵墓

保定府志卷四十三

古蹟錄三 陵墓

陵墓

中古

顓頊帝陵在高陽縣舊城東門外

大清一統志 萬曆十六年知縣

孔承先表以珉御史姜璧爲之記

高陽縣志

按路史疏仡紀帝顓頊高陽氏葬東郡頓邱廣陽里務昭之陽下不及泉四蛇圍之注俗謂之商王陵妄也郡國志

顓頊葬俗名青塚山皇覽冢墓記在濮陽頓邱城門外廣陽里崔鴻前趙錄和苞諫劉曜曰堯葬穀林市不改肆顓

頊葬廣陽下不及泉十道志鮒鮒卽廣陽山之別名也寰宇記廣陽在頓邱西北二十五里通冥記帝陵在相州臨

河乾德四年置先代帝王守陵戶高陽縣在臨河寰宇記臨河東九里有顓頊廟九域志順安高陽縣有顓頊陵考順

安宋軍名在今高陽東二十五里則高陽有陵相傳已久若顏真卿吳地記烏程有顓頊陵輿圖備考山東東昌府

西北有高陽氏陵恐非又按金史祭顓頊於開州古頓邱卽今開州故縣志謂在高陽者爲衣冠塚云

明姜璧顓頊帝陵碑記史稱顓頊氏初國高陽而今治之東南舊壤有封邱在跡傳志之紀述故老之傳說以爲茲顓頊氏陵寢也則高陽爲初國諒矣第歲異而月不同時而祠時而隨圯時而祀時而隨隳甚則陵葬至今煙草蒼茫有不知爲誰氏之墟矣觀者能無感於斯乎適闕里孔賢侯來牧茲邑舉若弛修若廢飭若典章躡疆井者誦高陽氏之風已父老曰惟茲祀典可久闕不舉哉遂東指帝陵懇豎石爲修祀記侯曰夫祀以明禮禮以著誠誠且禮義舉也舉而義甯禁所爲具文申請當道俱曰可諸父老因鳩貲購石屬記言不佞不佞竊謂功不及民不祀祀不稽古不舉非功而祀則誣不稽而舉則誕誕且誣祀何裨禮不云乎有功於民則祀之黃帝正名百物以明民共財顓頊能修之斯舉也不惟功耶不及古耶舉而惟功則樹德不朽舉而稽古則崇祀不淫躋哉侯之俞衆議乎昭正祀示民軌矣且此方民物莫安教養咸備尤爲帝之遺澤號稱八愷若蒼舒隕斂輩今日彪炳寰宇以倡起多士之才猷亦疇非帝德之苞而孕也夫八土祀於鄉而况功於帝乎侯之俞衆議良躋哉雖然海不辭東流者大之至也聖人並包蓋輿陶鑄疇類而忘其誰氏奚以俎豆爲聖人以天地爲大鑪造化爲大冶又豈區區於一坏之士而與木石校存亡意斯舉也蓋亦有隆古之思乎聞禮云有虞氏祖顓頊而宗堯孔子系出有虞氏是唐虞之理所濬發者遠孔子之祖述固先程也况夫承孔子之後撫高陽氏之遺民者宜若之何斯舉也豈獨昭正祀示民軌將使觀

世風者眠其石隆其治也士民仰體德意時厥祠修厥祀
殫厥誠以無廢厥禮則務義敦典奚幽不格行且見治化
之翔洽人文之蔚里與
此石不朽矣於是乎記

堯母陵在望都縣城東門內池南墓前有廟

縣志見壇廟詳

按水經注成陽西二里有堯陵陵南一里有堯母慶都陵
稱曰靈臺後漢堯母碑慶都仙歿蓋葬於此後人莫知名
日靈臺述異記成陽縣城南有堯母慶都墓然漢其地理
志濟陰成陽有堯冢靈臺後漢書章帝紀元和二年二月
東巡狩使使者祠唐堯於成陽靈臺安帝紀延光三年二
月庚寅祠唐堯於成陽皇覽堯冢在濟陰成陽帝王世紀
堯葬濟陰成陽西北四十里諸說均未言成陽有慶都陵
明史嘉靖十八年帝謁顯陵歸過慶都祀堯母墓考慶都
縣因堯母得稱今改曰望都堯初封於唐今唐縣
與望都接壤明史地理志慶都有堯母墓是也
明麻培堯母陵詩堯母丹陵何處尋竭來惟見草森森風
吹斷碣苔痕滿雨過荒臺樹色侵夢入赤龍懷聖子形同
委蛻傍高岑幾回想像儀容
杏水繞山環自古今
郝浴堯母陵詩萬古堯天戴重恩實此開丹陵餘白書紫
氣繞燕臺八彩常留照三多共幾回可憐城下水曾洗聖
人來

方觀承堯母陵詩堯寓至今存巍巍母德尊祥鍾冀星野
名擬漢宮門邑宰添陵樹居人采澗蘩井亭千載下飲水
合思源

丹朱墓在望都縣城東門外東南百步許舊志堯處子朱於丹淵

為徹侯故曰丹朱漢書地理志

陳洪書丹朱墓詩聖德殊難肖承家不忝賢封侯甘克讓
守祀竟長延芳草眠碑斷桑麻遠墓圓高陵依大母靈爽

共雲煙

周戰國

齊順王陵在滿城縣西三里陵山南阿舊志

臧荼墓在滿城縣北三十里同上

劇辛墓在容城東二十五里劇村大清一統志

智伯墓在東鹿縣東南三十里智邱村舊志

廉頗墓在府城西北廉梁村舊志有祠堂大清一統志

樊於期墓在蠡縣南莊村墓前舊有廟碑

大清一統志今廢縣志於期

爲蠡之南莊人自到後其遺骸葬此立祠祀之

舊志

秦

甘羅墓在唐縣城東北二里王家莊北舊有石欄石碣今止存

兆址

舊志參唐縣志

漢

張蒼墓在滿城縣西十里

大清一統志

昇賢村

滿城縣志

高帝時蒼定律

令敷章程攻燕有功封北平侯

舊志

王尊墓在高陽縣東北二十五里尊官東郡太守

舊志

冢元在武

垣城東北隅尊爲東郡太守而卒其柩一夜自歸今猶祀之呼

爲東郡阿翁歸

寰宇記

齊蓋墓在蠡縣五房村東北八里蓋封關內侯有五子因以五

房名村

蠡縣志

蠡吾侯塚在蠡縣城東二里桓帝父蠡吾侯翼卒葬於此後追

崇曰博陵

大清一統志

蔡仲塚在高陽縣城東寰宇記九州要記云漢南陽大守高陽

侯蔡仲塚在城北仲曉厭勝之術其塚至今無狐狸穴

大清一統志

中山康王頃王憲王三陵在唐縣城西北

雍正通志

按唐縣志以水經注滹水所歷之地考之應在縣西南今未詳所在

晉

劉伶墓在安肅縣城西二十五里張華村伶官參軍

舊志

按晉書本傳伶沛國人又按安肅在晉爲北新城縣兩地相距甚遠而縣志謂昔年曾訪張華至此卒葬之至今塚

存焉

謝昌言言劉伶墓碑記今古之言規行矩動止不失者推宋儒爲最而伯倫則放達自高禮法所不得而繩也余嘗譬

之書法宋儒則帖中之顏柳而伯倫則懷素也又嘗譬之
文章宋儒則文中之韓歐而伯倫則蒙莊也善書者既肖
乎顏柳而又參之懷素用筆乃生新善文者既熟於韓歐
而又進之以蒙莊氣象乃變幻然則立品者由宋儒而精
之更運以劉伯倫之曠達乃能與世推移而不流於拘牽
伯倫生於晉木沛人也誌載與張華善訪之而卒於此地
遂葬焉余讀其酒德一頌戴天席地輕世肆志更觀其荷
鍤便埋一語一若置死生於度外而惟酒是耽不可須臾
離者迄今世俗好飲或以爲伯倫氏之流風而古今亦遂
共以酒人目之余意竊以爲不然自漢季式微曹瞞父子
好爲巧詐竊取神器司馬氏尤而效之等倫紀於鴻毛視
富貴可術取君臣父子間有戎心焉其後遂漸積爲風俗
天下靡靡狂瀾莫挽伯倫抱匡濟之才蒿日時艱然位不
過參軍手無尺寸之柄欲大聲疾呼痛哭流涕又慮直言
賈禍於是不得已而逃於酒借杯中之醕醪澆胸中之塊
壘終日在醉鄉中而世道之沈淪總置之不議不論蓋其
品似衛伶之執籥秉翟而並不露榛苓美人之思其心同
孤竹之采薇行歌而並無命衰安往之嘆世人不察指爲
酒人幾使伯倫笑千載下無知已也余治安肅之明年因
公至遂城訪伯倫之遺跡見孤塚倒塌將爲種麥之場因
謀之孟生諱良棟者使之倡首聚貲購工封土又雜植翠
栢數十并結亭於前勝曰酒德仍伯倫舊也於時憑眺四
望瀑河繞其北郎峯環其西東南皆村墟碧綠交陰田疇
每每攬山川之形勝撫郊野之青葱眞覺伯倫之高曠呼

之欲出韓子所謂事有曠百世而相感者余亦不自知其何心也彼好飲而自附於伯倫是猶未學書者而遂摹懷素未學文者而遂擬蒙莊其不流爲牛鬼蛇神也幾希余悲伯倫之志而並以告肅之人使無伯倫之高品寧言規行矩動止不失焉可也慎毋妄託伯倫而

並重誣伯倫也捐貲姓氏例得刻於碑陰
明鄭材過劉伶墓詩西郊有古塚傳是晉參軍頌德酒堪紀閉關才不羣郎峯淒暮雨瀑水咽寒雲荷鋤雖黃土千秋白骨芬

張華墓在安肅縣城西二十里

舊志參安肅志

按晉書本傳張華范陽方城人考方城卽今固安永清地通志謂蘆溝橋北有張華宅據此與安肅相距非遙且邑有張華村或因其墓以名村縣志謂土人掘之見墓中四壁繪畫宛有生氣蓋茂先精靈所致云

謝昌言張華墓碑記略張華字茂先通志郡志皆云是范陽人邑乘云安肅人有墓在焉與劉伯倫友善伯倫自沛上越數十里訪張華於此地後卒遂葬此迄今兩墓相望余於戊寅春旣倡修劉伶墓且爲建酒德亭於上至所謂張華墓故老無存鮮有識辨者更閱月餘孟生良棟多方採探乃得其故跡余因命封土棺並豎碑於上因丐余言誌墓以垂不朽夫有夷吾之才而後能交鮑叔有諸葛之學而後能傾先主況劉伶抱卓犖之資不特傲睨一世抑

且目空千古獨於張華乃能結死生交則張華之行誼亦可概見矣迹其贊成羊祜伐吳之功吳平封廣武縣侯後為都督幽州諸軍事領護烏桓校尉撫納華戎內附者二十餘國惠帝朝與裴頠同心輔政海內晏然進封莊武郡公為司空領著作郎及趙王倫與孫秀謀逆華與頠俱被害朝野悲之華博物洽聞所著有博物志及文章行世真此邦之秀也後有啟張華墓者見其四壁繪畫宛有生氣夫張華之形銷影沈已閱千百年而猶能使地效其靈若此則起張華於今日其所以矜式我肅人者當何如哉因撮其大略而為之記

田遠隨墓在博野縣西許村遠隨官湯陰令有墓誌後人移石

嵌龍王廟壁

博野縣志

北魏

崔重和墓在博野縣王母村重和官長史

博野縣志

崔續墓在博野縣王母村續官刺史

同上

崔纂墓在博野縣王母村纂官中郎

同上

按博野縣志崔氏三塚皆邑人耕地得其墓志者

隋

班妃塚在安肅縣西四十里馬山煬帝妃道薨葬此

舊志

馮原墓在高陽縣城南四里原官郡功曹

高陽縣志

隋馮原墓誌君諱原字士陸河間高陽人也家傳積德世業克隆惟祖父宦成名立其開國成家之始發原受命之田世踵英賢已詳史策君體局閑雅志業深遠清風素範獨步當時據德依仁見推州里天資孝友已總率於心神自然誠信亦兼備於襟抱年甫弱冠郡辟司功俯協時望非其好也尋卽謝病桑梓不事王侯樂道怡神脩然物外雖彼翹翹車乘視之若埃塵嗟嗟束帛遺之如草芥鐘鼓不能動其慮軒冕未足撓其情賁有道於邱園方期之於遠大胡其不壽今古同悲甯謂天地無心神祇不惠以隋仁壽四年二月二十三日遘疾云亡時年五十以大業六年十一月二十一日塋於縣城南四里子意政勤茂等悲陟岵之無見歎負米之無爲想罔極之深恩控蒼昊之莫報淚流所染則墓栢焦枯啼聲所聞則庭禽迸迹寒來暑往地久天長盛範數猷煙滅終古爰勒碑銘寄之來世

唐

許遠墓在安州城東南二十里遠官睢陽太守

舊志

崔珏墓在祁州西南隅

大清一統志

珏字子玉衛縣令有異政及逝

代顯靈迹唐宋間加封護國西甯王

舊志

張行成墓在望都縣張娥村西行成定州人高祖時拜左僕射

卒諡定詔配享高廟

舊志參望都縣志

郝綰墓在安州綰為殿中監塋唐興縣招賢鄉有碑記

安州志

按武興縣唐神龍初改名唐興金時徙安州來治

唐郝綰碑記府君諱綰其先高辛氏之苗裔迨乎奕葉傳芳冠冕相襲分茅裂土以命氏焉遂為太原人也曾祖諱文經右羽林將軍孤高敏達器宇岐嶷文足以經時武足以定亂翊贊王室輝煌帝猷祖諱山彪瀛州錄事參軍涖政寬平簡約清儉奉公道而夕惕主紉司而肅然府君即公之長子也以讜直自持佩服德義笙簧于五典筐篚其六經早應甲科尋明經擢第首邁流輩聲震春闈復以詞藻清雅才思卓犖高蹈不仕水石為心爵祿不榮適道無悶嗚呼天監何昧不壽哲人以元和八年正月歿於唐興之私第享年六十有三夫人備持大節依禮制主喪縞服蓬鬢毀容守貞素而自持却鉛華而不御以鋒年依水去元和十年十月卒於私第春秋五十五有子三人長曰英

次曰俊不富其壽短折芳年季子英傑為雲麾將軍守右金吾衛大將軍試殿中監志氣凝然神姿迥拔精於武游於文運韜鈴於指掌制擒縱於襟懷頃因署職河東為并州大將兼巡撫使邊陲肅清寇戎外靜會幽州節度使左僕射楊公以能足服遠籍輪輻遷公為心膂欲公為梁棟公遂感激旋赴君得其臣公契其義功成名立顯赫邦家盛哉公每悲松栢已行未耐窳力營葬事以副宿心開成庚申歲五月癸酉朔十二日合葬於鄭州唐興縣招賢鄉之原禮也其華勳茂績以刊石記之銘曰華勳茂族奕葉重光衣冠濟美為侯為王淳和之精挺生賢英高蹈不仕雲霞逸情門風不墜繼襲簪纓腰金拖紫巍巍墳邱星霜倏易松楸煙浮亭亭吊月邈邈千秋

孫府君墓在博野縣東陽村天寶七年葬此土人得其墓石遺

其名博野縣志

張興墓在東鹿縣城北興為饒陽裨將殉城死東鹿縣志墓草獨紅

相傳為忠血所化大清一統志

李符清紅草坡懷張將軍詩序將軍名興東鹿人為饒陽裨將祿山之變堅守彌年城破不屈死之墓在鹿城北草獨紅詩云饒陽城頭夜吹角范陽賊兵如蟻薄大軍方聞出井陘彌年守此控河朔此時雖已陷常山此時猶未失

潼關直入一軍作保障威風凜凜同二顏豈知滄趙諸郡
失外援俱絕臣力竭禍福還當曉敵人丈夫甯爲刀鋸屈
難將大義感賊臣猶有英魂懾賊軍烏合眞如巢幕燕可
憐安史徒紛紜二十四郡遙相望幾人能與賊相抗朝廷
未識顏平原那知更有張裨將嗟乎唐家再造李郭功制
賊此與睢陽同精靈炯炯依故土千秋青史標孤忠今我
重來懷往烈茫茫一片燕山雪獨
看墓草露猶紅野人指是將軍血

苑宗禮墓在博野大苑村宗禮官御史天祐九年葬此

博野縣志

楊廷晟墓在博野縣南小王村有墓石

同上

五代

李愬墓在安肅縣西孫各莊石晉時愬官武遂隊明萬曆末鄉

人掘地得墓誌

舊志參安肅縣志

宋

三陵在府城東南宋僖祖曰欽陵順祖曰慶陵翼祖曰安陵

舊志

太平興國中以祖宗陵墓所在因置保州

大清一統志

周王元儼墓在容城縣城東北十里石碣猶在元儼太宗子眞

宗弟也

雍正通志

劉惟德墓在清苑縣百塚村北惟德官將軍

清苑縣志

劉文亨墓在清苑縣百塚村南文亨官御史大夫

同上

楊業墓在唐縣西北一百一十里業贈太史令戰歿葬此

舊志

程氏祖塋在博野縣程委村北二里宋儒程子五世祖塋也兆

址猶存墓北有石碣明道伊川立

舊志

韓義賓墓在博野縣蠡吾村北韓魏公琦五世祖塋也琦嘗封

樹祭告於此見安陽集

博野縣志

張玉墓在博野縣張岳村玉官虞侯

舊志

狼總兵墓在博野縣蠡吾村陣亡無首以銀像之

舊志

程炎

避諱

墓在博野縣程委村炎官博士

同上

焦瓚墓在雄縣西樓村

雄縣志

金

章宗妃墓在新安北段村五里黃土臺妃姓李氏章宗元妃

舊志

參新安志

劉孝子珏墓在滿城縣城南六里受陵村南

舊志

苗道潤墓在安肅縣城西南四十里道潤官中都留守有神道

碑

舊志

時立愛墓在新城縣城西北里許立愛官中書令封陳國公

舊志

金李宴榮國時公神道碑銘崇進榮國公時公之墓在涿州新城縣孝悌鄉板築里公之曾孫璠方為易州幕官來告曰先祖開府郡王既葬四十餘年翰林字文特進奉勅撰次誌銘藏於墓矣正隆之季例削異姓之封降授崇進榮國公其墓道之碑未立子宜為銘會晏方侍親之郡實未暇也及晏召還而璠云亡大定二十有八年秋八月璠之諸弟瑄玘瑋瑤復以乃兄之意屢請文雖甚陋義安可辭為之銘曰時氏之先鉅鹿為氏粵在戰國齊有時子降

及曹魏苗其後裔留犢壽春清名不旣枝分派別史失其譜占籍新城公之遠祖會祖廷義考槃不仕鄉黨稱善陰德潛被祖嚮仁儉家資饒裕周濟艱急美行尤著父諱承諫積累巨萬發倉貸人每折其券負郭沮洳常阻行路創石爲梁人得平步善慶攸鍾是生我公追榮二代一品其崇趙張王氏三母夫人皆封國太光華外姻雁行九人五兄三弟公名立愛昌壽其字始生之夕環居赤氣又遇異僧指公相貴及長好學甫二十二太康九年登進士第調泰州幕通達史事老胥巨猾噤不敢議俄終父喪復倅春州曾未逾年擢爲縣侯爲此雲內素號繁劇片言裁決獄衰訟息連宰大邑馬城文德鳴琴之政與雲內一密院治書精選進士宰相杜公擬公以試遼主灼知公之才力即日召見喜形於色俾主吏房復領承旨自副及都恩隆鮮比升二憲臺御史中丞剛亦不吐權臣是懲于時權臣竊弄國柄正衙捫刻膽落心病出副燕守旋丁母艱奪情特起俾仍舊官國之將亡正人弗用權尹遼興兼漢軍統天輔癸卯皇朝肇造太祖滅遼仰順天道南略燕壤公鎮平山呼集將吏共議所安僉曰三州衆有十萬堅守歲月以需外援公曰不然有遼失政河決魚爛安能復振況以神武颺驚電擊天命人心皆親有德不忍州人屢此禍機乃率其衆納款來歸帝曰俞哉嘉汝先識爰命有司亟超顯職公復上言人心惟危叛亡保聚頗懷懼疑皆言大國所下城郭始則存撫終爲俘掠民罔常懷懷于有仁宜以恩信固結斯民綸言嘉歎卽諭諸軍秋毫無犯輿情欣欣先